

LETRA AVERTA

L'Istitut l'è na Majon delicata, »da manejar con cura«

Dò la paroles del diretor de l'Istitut Cultural Ladin Fabio Chiocchetti, che aon podù lejer la setemèna passèda su La Usc, publicon la letra averta de Antone Polam, stat president de l'Istitut Cultural Ladin e de l'Union di Ladins de Fascia, de chela che l'è president onorèr

Caro Fabio, che tempes trisc, mesties che sion dò che passon!

E no demò per chesta burta pandemia che se tol dò, un a la uta, no demò veies (scrins de saeres che no vegnarà più de retorn), ma ence omegn e femene amò joene, desché mia colega Tania Trimarchi.

Me endespiasc e me fasc mal al cher veder chel che l'è sozedù ti ultimes tempes te l'Istitut Cultural Ladin e veder coche tu vegne "paà fora" dò passa carant'egn de lurier fat con pascion, inteligenza, capacità, dedizion, tras ence dò vea.

Gio, dò 20 egn de President de l'Union di Ladins de Fascia é abù l'onor de esser nominà President de l'ICL, enciaria che é portà inant per doi mandac. Ence gio ti prumes egn é fat valch fal, te Consei l'è stat valch moment senester, ma l soul fin che é tras abù tedant l'è stat chel de vardar al ben de l'Istitut.

Con l'ultim Consei l'è stat zis bel lurar se joan del contribut propositif e inovatif del professor università Matteo Ploner, de Annalisa Zorzi, Lodovica Dioli, Riccardo Nemela...

L'Istitut l'è na Majon delicata, »da manejar con cura«, con delicateza, aee dit al moment del passaje de consegne co la neva Presidenta, l'avocata Lara Battisti. E respet... »respet per chi che à esperienza«, scrif la Professora Ulrike Klindl, da 40 egn te la Comiscion Culturala, moeta demò da na gran pascion per l'lengaz e la cultura ladina.

Ge volessa che duc chi che passa la sava de usc de l'Istitut i varde l retrat del Professor Heilmann. I se ferme tedant al bust de Pare Frumenzio... i se fegure de i aer lò tedant che i li varda e i li scouta canche i tol la parola e i tol valch dezijion... E chi che se tol sù na enciaria politica o istituzionala i dojessa se meter a la leta per l Ben Comun.

Son d'acort, Fabio con toa proponeta de ge dar sù al Comun General l poder de dezider la governance de l'ICL e la funzion de control aministratif, ma ge vel che l desmostre la capacità de gestir le competenze: per esempio la Moniaria, con projec, finziamenc e dut enjignà, dò 5 egn l'à amò da pontar via. E son a una de passar l personal diretamente sot la Provinzia, che se tolessa sù dut l peis tant finzial che de gestion. Chest libressa l'Istitut da duc chi leames burocratics che i à tras ferà l lurier scientific e cultural.

L'Istitut era nasciù per volontà de l'Union di Ladins, de gra a persone desché Danilo Dezulian del Garber, che l'era president de l'ICL del 2005, canche l'è mort: apontin chisc dis, ai 12 de oril, l'è l 15em cedeàn, e gio l recorde semper con gran comozion.

Sot toa direzion, Fabio, l'ICL l'è tras stat na scola de auta formazion per studenc, insegnanc, enresciores, studiosc, amministradores... amò inant che la vegne istituída en colaborazion con la Scola Ladina. La realisazion del Museo te si senta zentrala e sun dut l tegnir de la Val la é stata fondamentala per ge trasmetter l'arpejon culturala ladina ai joegn, a le neve generazion.

No te destrameter, caro Fabio! Dut chel che t'as semenà te duc chisc egn l'à jà dat fruc e l seghitarà a n dar ence tel davegnir. T'as enjignà na squadra de operadores culturai de lingüisc, bibliotecaries, archivisc, che portarà inant l lurier da te scomenzà. A duc chisc, un per un, ge envie n fort braciacol.

E per fenir, coche dijea l Canori »lascia che l beghe l mondo perecos, e che l sen destrighe enstes, valo ben, noiautres jon a cime, più che podon da spes e endò da nòf!

Antone Polam dal Maester



Antone Polam te na radunanza de l'Istitut Ladin con la presidenta de la Comiscion Culturala Ulrike Klindl e l diretor Fabio Chiocchetti.



Antone Polam, Mirella Florian, Luigi Brunel e Ferruccio Chenetti, stac president de l'ICL di ultimes 30 egn, de firé en ocasion de la recordanza di 100 egn da la nasciuda de P. Frumenzio. Mencia Danilo Dezulian: ai 12 de oril se recorda l 15° cedeàn de sia mort.